

SOKONG MEMBAWA REBAH

KELUH KESAH PENUNTUT MESIR ATAS TUDUHAN SULTAN KEDAH

Boleh dikatakan semua ahli-ahli agama di seluruh Semenanjung Tanah Melayu telah terperanjat besar apabila menatap ucapan Sultan Kedah di dewan Sekolah Agama Al-Maahad Al-Mahmud. Di Alor Setar pada 25 September 1952 yang di dalamnya ia menyatakan bahawa penuntut-penuntut yang di Mesir itu akan senang sahaja dapat dipengaruhi oleh benih-benih komunis dan apakala mereka kembali ke Tanah Melayu kelak mereka akan membawa bahayanya ke negeri ini.

Komunis Agama?

Tuduhan ini adalah sangat-sangat berat didatangkan oleh seorang Sultan kepada rakyatnya yang belajar yang terbanyaknya di Al-Mihal agama di Mesir itu. Kita telah menerima beberapa pucuk surat daripada beberapa penuntut Mesir yang mengharap supaya kita mengambil berat di dalam perkara ini oleh sebab tuduhan-tuduhan yang sedemikian itu, menurut pendapatannya mereka dan harus juga lain-lain orang adalah menghina kepada pelajar-pelajar Islam yang berniat di dalam pelajarannya itu semata-mata berbakti kepada kemulian agamanya, kesejahteraan agamanya dan harus telah terasa kepada mereka bagaimana acuman-acuman yang telah didatangkan kepada bangsa mereka (Islam) di dalam negeri ini sehingga ada ura-ura yang bertujuan hendak mencabut pelajaran agama itu daripada umbinya sekali – iaitu suatu ura-ura yang kelak akan menghilangkan kuasa dan di dalam negerinya sendiri.

Sebelum kita memberi fikiran di dalam perkara ini maka terlebih dahulu kita menarik perhatian iaitu adakah tujuan kehendak daripada ucapan Sultan Kedah itu diasaskan di atas perkataan komunis itu dengan komunis yang sebenar atau ia suatu istiarat yang lama yang biasa difahamkan bahawa orang-orang yang akan membentangkan hukum agama nanti dengan berdasarkan Al-Quran dan Al-Hadith itu semata-mata komunis? – Sebagaimana yang biasa terjadi di dalam masa yang lampau apabila seorang guru mengajar dengan dasar Al-Quran dan Al-Hadith serta menentang

khurafat-khurafat yang ada utamanya yang berakar berumbi di dalam istiadat-istiadat raja itu digelar komunis??

Kita berkeyakinan bahawa kehendak daripada ucapan itu adalah pada tentang yang kedua – tidak pada tentang yang pertama oleh kerana kita yakin bahawa ia tentu mengetahui apa sebenarnya komunis itu dan sebab itulah dapat disimpulkan fahamnya sebagaimana yang kedua iaitu sebagaimana biasa didatangkan tuduhan-tuduhan pada masa yang lampau bahawa “barang siapa membawa pelajaran-pelajaran yang berterus terang berdasar kepada Al-Quran dan Al-Hadith itu” ialah orang-orang komunis – iaitu tuduhan-tuduhan yang biasa dijalankan oleh orang kita kepada mereka yang berani menentang segala khurafat yang sebatik yang ada di dalam lingkungan-lingkungan kita.

Jika benar tekanan kita itu maka haruslah Yang Maha Mulia Sultan Kedah terasa bimbang kepada pelajar-pelajar yang ada di Mesir sekarang oleh kerana apabila mereka balik ke tanah air mereka sudah tentulah mereka tidak akan mahu menjadi orang yang “muzabzam” oleh kerana sudah tentu mereka akan berkata berterus terang di dalam mihal agamanya dan akan bekerja dengan kuat menghapuskan khurafat-khurafat yang ada di tanah air mereka yang telah menjadikan ruh Islam itu mati, tidak beramai, tinggal hanya di dalam ibadah semata-mata; dan yang telah menjadikan tiap-tiap penduduk negerinya orang-orang yang taklid buta yang di dalamnya sebahagian besar “ulama” mempertahankan peluang itu untuk

memerah penduduk-penduduk tertakluk kepadanya berserah bulat mengikut apa katanya dengan tidak sedikit pun diberi berfikir. Dengan tidak sedikit pun diberi pertunjuk untuk menghapuskan segala “kezaliman pemerasan dan tipuan yang dijalankan berselindung dengan kehendak-kehendak agama yang sebenar.

Dengan kerana itu menurut pendapat kita, harus Sultan Kedah khuatir. Dengan kerana yang tersebut itu apabila penuntut-penuntut itu balik kelak maka ulama-ulama yang berdiri di sisinya akan kurang pengaruh kepada umum terutamanya pula orang-orang yang telah menderita dengan adanya berbagai-agai hukum yang didasarkan kepada “nafsu” sebahagian daripada pengasas-pengasasnya akan menunjukkan tidak puas hati lalu berkata dengan berterus terang dan menuntut dengan secara yang berterus terang kepada keadilan yang sebenar yang didasarkan kepada Al-Quran dan Al-Hadith – maka mereka itu pun digelarkan komunis (sebagaimana keadaannya yang telah lalu).

Kita harus memberi ingat bahawa langkah-langkah yang sedemikian itu sudah tidak sesuai lagi keadaannya pada masa sekarang. Kalau dahulu senang menuntut orang kepada taklid buta tetapi keadaan jiwa orang sekrang sudah berlainan – mereka tidak mahu menerima suatu melainkan ada keterangan dan alasan serta hujah-hujah yang makbul diberi kepada mereka. Merka sekarang tidak lagi menerima bulat-bulat apa yang dikatakan oleh gurunya dengan tidak ada alas an yang diberi terutamanya daripada Al-Quran dan Al-Hadith.

Dengan kerana kemajuan-kemajuan jiwa yang sudah begitu alirannya maka adakah patut perbuatan-perbuatan mereka itu dikatakan perbuatan-perbuatan komunis? Adakah tuduhan-tuduhan itu didatangkan oleh kerana nanti orang tidak mahu menyembah seorang raja mengikut suatu persembahan yang ditegah oleh syarak? Adakah yang demikian itu ditakuti kelak kerana mereka membawa benih menghapuskan segala khurafat-khurafat, kenduri-kendara, berarak membawa kemenyan dan air tepung tawar yang dibuat untuk ziarah kubur atau haul raja-raja yang lalu? Adakah tuduhan itu diadakan oleh kerana mereka nanti sepulangnya mengikis perasaan-perasaan “taukeh-taukeh kubur” yang menjaga keramat-keramat dan tukang mengaji di atas kubur yang menanam perasaan pemalas kepada tiap-tiap orang Islam?

Jika yang demikian itulah keadaannya maka tidaklah salahnya penuntut-penuntut itu digelar komunis (mengikut fahaman yang kedua - kerana mereka itu sudah tentu jiwanya dan ruhnya bekerja kepada acuan dan kehendak yang dijalankan oleh Al-Quran dan Al-Hadith – tidak kehendak tukang-tukang baca doa disisi Sultan yang sentiasa memejamkan matanya walaupun keluarga diraja melakukan perbuatan-perbuatan yang asi tetapi doa dibaca juga. Kalau demikian ini keadaannya maka sampai bila-bila pun keadaan dinegeri Kedah itu khasnya dan di Semenanjung Melayu amnya tidak akan bangkit selama-lamanya. Kuasa ada tetapi tidak dijalankan. Zakat dipungut tetapi yang miskin bertebaran sekolah tidak berperaturan dan tidak bertadbir jika fahaman yang demikian ada tidak mengapa-lah penuntut-penuntut di Mesir itu digelar komunis tetapi mereka bukan komunis yang benar bahkan mereka ialah pahlawan-pahlawan Islam yang telah dapat peluang menuntut ilmu yang direhdai oleh Allah untuk membuka mata orang yang telah terbawa-bawa di dalam bidaah dan khurafat yang sudah tertanam berurat berakar di dalam negerinya.

Tetapi sekiranya mereka digelar komunis yang tulen maka kita bersama-sama membantah sebagaimana juga bantahan-bantahan penuntut itu sendiri oleh keran tiap-tiap seorang Islam yang telah beriman kepada kitab Allah dan sunnah Rasulnya walau bagaimanapun insya-Allah tidak ia menjadi komunis kalau yang demikian itu yang dituduhkan maka samalah juga keadaannya menghina seluruh umat-umat Islam iaitu suatu penghinaan yang sangat berat dan menodai tiap-tiap hati umat Islam.

Kita berharap pada masa-masa yang akan datang hendaknya janganlah ada lagi tuduhan-tuduhan atau ucapan yang diberi oleh orang yang berketanggungan sedemikian itu yang akan menyakiti perasaan dan hati umat Islam, berilah kepada mereka itu ucapan-ucapan penggalak. Ucapan-ucapan yang menaikkan kegembiraan dan kegemaran supaya mereka itu mempertahankan agamanya. Kerana apabila mereka beragama dan mempertahankan hak-hak agamanya maka bermanfaat raja-raja itu akan dapat terkawal dan yakinlah bahawa kedudukan umat Melayu di negerinya itu tidak dapat dipertahankan melainkan kita bersama-sama mendirikan agama – Pengarang